



*Iacob pour aller en la terre de promission delaisse Laban, par lequel il est poursuivy: puis font appointement ensemble.*

**J**ACOB desirant se retirer d'avec Laban, pour avec ses femmes demeurer en la terre à luy promise. Laban le pria de demeurer encore, & accorderent ensemble, que le loyer de Iacob seroit toutes les oüailles tachetées; occasion que Iacob mit des verges pelées es auges, où on abreuuoit les brebis, pour les rendre bigarrées: & souuent s'échauffoient, & conceuoient au regard desdites verges, parquoy leurs petits estoient tous marquetez, qui fut cause que les troupeaux de Iacob multiplierent en telle quantité, que Laban & ses fils en furent malcontens. Ce que voyant Iacob, print ses femmes, & troussant bagage s'enfuit avec son troupeau. Laban aduertiy de ce, courut apres, & les atteint en la montagne de Galaad. Mais Dieu dit à Laban Syrien par songe, qu'il se gardast d'offenser Iacob: Toutefois il se plaignoit fort de ce qu'il le laissoit, & qu'on auoit dérobé ses Idoles, lesquels pensant recouurer, les chercha: mais Rachel les recela finement, & s'assit dessus, feignant estre malade. Et apres que Iacob eut remonstré son deuoir à Laban, ils firent accord ensemblement sur vne montjoye de pierre; & apres le sacrifice fait mangerent ensemble: & Laban ayant baisé ses fils & filles, s'en retourna en son lieu.

*Genese 31. Chap.*